

verborghen en sal sien als in deser tijt  
ghescheet meer van ansichte toe ansich  
te. want dan salstu my versaden myt  
een wonderlike sattheit soe doet my in  
eewicheit niet bet hongheren noch dor-  
sten en sal Amen. *En schoen ghebeth  
en seer deuot voer die ontfancnisse des  
alre hillichsten sacramentes christi.*

**O** here *Jesu* chre soene gods  
ick bidde dy om die glorie  
dijne alre hillichster  
passien dattu hude my  
siele wilste leyden inden kelre dijne al-  
re suetster mynne En doe van my al  
dat my hinderlick is. op dat ick teghe-  
woerdich mach wesen dier vrouden  
ende der enicheit der onderlingher ver-  
enighinghe Op dat ick myt vulcoeme-  
re mynnen 2 mach ghebruken die soe-  
ticheit dijns begheerliken troestes Daer  
ome com o alre ghetruweste vader der  
wesen Com alre suetste troester alre on